

**(1) Imbiru rudzii iyo Jesu anotikoka kuti titeedzere?**

*Johane 13:34*

Mwari ndiYe anopa upenyu, chiedza uye mufaro kuzvinhu zvose. Anodurura zvikomborero zvaKe kuzvisikwa zvaKe zvese semisewe yechiedza inobva kuzuva, uye setukova tunoerera tuchibva pachitubu chinofashukira. Uye pese apo pane rudo rwaMwari mumwoyo, runoerera kunevamwe murudo nezvikomborero. Rufaro rukuru rwaJesu runobva pakutisimudzira nekutiponesa kubva muchimiro chedu chezvivi. KwaAri, kutiponesa kwakanga kwakanyanya kukosha kupfuura upenyu hwaKe uye akahupa pachinzvimbo chedu. Akatambudzika pamuchinjikwa akatakura kunyadziwa kwedu. Nengiroziwo, nguva dzese dzinenge dzichishandira mufaro wevamwe, nokuti uyu ndiwo mufaro wadzo. Zvisikwa izvi zvisina chitema zvinongogara zvichitibatsira, kunyange tiri varombo vanosiririsa uye tisina simba rakaenzana nerazvo uye tiri vaduku zvishoma pahukuru nezvimiro zvazvo. Mweya waKristu werudo rwekuzvipira ndiwo mweya unozadza denga nerufaro. Ndiwo mweya uchava nevateveri vaKristu. Kana rudo rwaKristu ruchigara mumwoyo, harugoni kuvanzika sezvinoita kakunhuwirira kakanaka kanofadza. Munhuwi uyu unonzwika nekubata avo vakatitenderedza. Mweya waKristu mumwoyo chitubu mugwenga chinoerera kuvandudza munhu wese, chichiita kuti avo vose vavakuda kufa vave nechidiso chekunwa mvura yeupenyu.

**(2) Sei Jesu akauya pane rino pasi?**

*Mateo 20:28*

Rudo rwedu kuna Jesu rucharatidzwa muchidiso chekushanda semashandiro aakaita ayo aiva chikomborero nerubatsiro kune vamwe. Kuteedzera muenzaniso waKe kunotibatsira kuratidza rudo, unyoro uye tsitsi kuzvisikwa zvese zvinochengetwa naBaba vedu vekudenga.

Hupenyu hwaJesu mupasi rino hwakanga husiri hupenyu hwemutambarakede (mutambaratede / depfure) nekungozvifunga. Akashanda zvisingaperi, akaperera nekushingaira kukuru kuti aponese avo vakarasika muchitema. Kubva muchidyiyo chemhuka kusvika kuKarivhari nguva dzose akanga asingazvifungi uye haana kuedza kunzvenga basa rakaoma. Marwadzo aakapinda mukati mawo paaifamba, uye hanya yaairatidza zvese zvaingoitirwa kubatsira vamwe. Akati iYe, “handina kuuya kuzoshandirwa asi kushandira.” Ichi ndicho chakanga chiri chinangwa cheupenyu hwaKe. Zvimwe zvese zvaitouzouya pechipiri. Chinangwa chaKe chakanga chiri chekuita kuda kwaMwari nekupedza basa raKe. Izvi ndizvo zvakanga zvakaita sezvekudya nemvura kwaari. Chindini chakanga chisina nzvimbo muzvinhu zvaaiita.

**(3) Patinosvika pakuziva rudo rwaJesu, chii chichava chidiso chemwoyo yedu?**

*Johane 1:29*

Vese vakagamuchira nyasha dzaJesu vanhu vakazvimisira kuita chero chavangagona kuti vamwe vese vakafirwa naJesu vadyewo nhaka yechipo ichi chedenga. Vanoita zvese zvavanogona kuita kuti nyika ive nzvimbo iri nani sezvo ivo vaimbovawo mairi. Kutu munhu ave nechimiro ichi zvinobva chete pamwoyo wakashandurwa zvechokwadi. Patinongouya kuna Jesu, kunobva kwangozvarwa mumwoyo yedu chidiso chekutaaurira vamwe shamwari inokosha yatinenge tawana iri Jesu. Chokwadi ichi chinoponesa nekushandura hupenyu hachigoni kupfigirwa mumwoyo yedu. Kana tafukidzwa nekunaka kwaJesu uye tazadzwa nerufaro rweMweya waKe runogara matiri, hatizogoni kunyararira vamwe



tisingavatauriri. Kana tazviwanira kana kuzvinzwira pachedu kuti Ishe wakanaka tinenge tave nechekutaaurira nyika. Tichazoita saFiripi paakawana Muponesi. Tichakoka vamwe kuti vauye kwaAri. Tichavaratidza zvinoyevedza zviru muna Jesu nekuvatsanangurira zvatisati taona pamusoro penyika iri kuuya. Tinova nechidiso chakasimba chekutevera munzira yakafambwa naJesu. Tinozovawo nechidiso chaicho chekuti vakatitenderedza “vatarire Gwaiana raMwari” kuti naivowo vasvike pakuMuziva.

**(4) Chiiko tuso rekushandira vamwe pasina kuzvifunga?**

*Zvirevo 11:25*

Patinoshanda tichibatsira kukomborera vamwe tinowana zvikomborero zvichidzokawo kwatiri. Ndicho chikonzero Mwari chaakaitira kuti tivewo nechekuita muzano raKe rekuti vakarasika vadzoke. Akatipa kuremekedzwa kwekuva vadyi venhaka, vechimiro chinoyera chaKristu uye kuti tigovane zvikomborero nevamwe. Uku ndiko kuremekedza kwepamusoro soro uye rufaro rukuru kuru urwo Mwari angagona kutipa. Avo vanowanikwa vachishingaira mukuita mabasa aya erudo ndivo vanounzwa pedyo pedyo naMusiki.

Mwari angadai akaita kuti ngirozi dziwane mufaro wekuparidza evhangeri, kana kuti angadai akashandisa dzimwe nzira. Asi , murudo rwaKe rusingaperi akasarudza kuti tiite mushandirapamwe naYe murusando rwaKe urwu rwerudo. Akada kuti isusu tigovane murufaro uye muzvikomborero zveMweya zvinowanikwa kubva mukushandira vamwe usingazvifungi iwe pachako.

**(5) Kristu akatipa muenzanisoi wekusazvifunga?**

*2 Vakorinte 8:9*

Tinosvika pakunzwirana naKristu apo tinopinda mukutambudzika kwaakapfuura nemukati mako. Pese patinozvிரamba uye tichiitira mumwe munhu zvakanaka, zvinoita kuti chidiso chedu chekupa chisimbe mumwoyo yedu. Patinoita izvi tinoswedera pedyo naJesu uyo akaponesa nyika. Aiva “mupfumi, asi nokuda kwedu...Akava murombo, kuti imi nokuda kwourombo hwaKe muve vapfumi.” Ndeapo chete patinoshandira kubatsira vanonetseka patinoonawo kuti upenyu hunova chikomborero kwatiri. Ichi ndicho chikonzero chatakasikirwa naMwari.

Kana ukaenda kunoshandira Jesu nenzira yaanoda kuti vateveri vaKe vaite, uye ukamuwanira mweya, uchanzwa uchida kuva pedyo naYe. Unonzwa uchida kudzidza zvakanyanya pamusoro pezvemweya uye uchanzwa nzara nenyota yezvakanaka. Uchakumbira kuna Mwari, uye kutenda kwako kuchasimbiswa. Mweya wako uchanwa mvura zhinji kubva patsime rehupenyu. Paunozosangana nemiedzo, uye pazvinenge zvisina kumira zvakanaka, zvichakusunda kupedzera nguva yakawanda muBhaibheri nemukunamata. Unokura munyasha, wodzidza zvakanyanya pamusoro paJesu nekuswedera pedyo naYe.

**(6) Ndiani anotipa chidiso chekusvikira vamwe ne evhangeri?**

*VaFiripi 2:13*

**(7) Zvikomboreroi zvinouya kune avo vanobatsira vamwe?**

*Isaya 58:10, 11*

Mweya wekusazvifunga unoratidzwa nekubatsira vamwe unokudza, kusimbisa nekupa chimiro chinerunako rwakafanana nerwaKristu. Izvi zvinounza kugadzikana (rugare / runyararo) nerufaro kune uyo anawo. Kana zvadaro zvinangwa zvedu zvinobva zvave zvepamusoro uye hapachina nzvimbo yeunyope kana zvinonakira ini chete (chindini). Kana tava kurarama nzira dzaKristu idzi, tichakura nekusimbiswa mubasa redu kuna Mwari. Tichanyanya kunzwisisa zvinhu zvemweya, kutenda kwedu kuchadzikama nekukura uye tichagamuchira simba rakawanda muminamato yedu.

Mweya waMwari, achifamba mumweya yedu, Anounganidza zvinoyera mumwoyo yedu apo tinobatwa nenzira inoyera. Patinozvipira kuita zvinhu izvi zvisina chindini tichiitira vamwe, hazvina mubvunzo kuti tiri kusarudza nzira yeruponeso.

**(8) Chii chatingaita kusimbisa kukura kwedu muna Kristu?**

*Jakobo 1:25*

Nzira chete yekukura munyasha kuita iro basa Jesu akati tiite. Tisingasarudzi vanhu, tinofanira kubatsira vamwe sekugona kwedu. Tinogona kuita izvi nekukomborera avo vanoshaiwa nezvose zvatingakwanisa kuvapa. Simba rinobva mukuramboita (mukuramba tichiita), uye muzviito zvinotipa upenyu pamweya. Vamwe vanhu vanoedza kurarama upenyu hwechiKristu nekungogara vachingogamuchira zvikomborero zvinobva kunyasha dzaJesu. Kana vasina zvavari kuitira Jesu vari kungoedza kungorarama nekudya asi vasingashandi. Zvinhu izvi zvakangofanana munyika ino uye munyika yezvemweya; kungogara chete uku munhu asina zvaari kuita kunosvitsa munhu pakungorasikirwa uye nekuora. Ukaramba kushandisa maoko nemakumbo ako, nekukasika ucharasikirwa nesimba rekuzvishandisa. Ndizvo zvinoitika kumaKristu asingashandisi simba rawo raakapihwa naMwari. Havangotadzi bedzi kukura munaKristu, asi vanorasikirwawo nesimba ravanga vanaro kare.

**(9) Kristu akaudza sangano kuti riitei?**

*Mateo 28:19*

Sangano raJesu ndiro chombo chaMwari chaanoshandisa kuponesa vanhu. Basa resangano kutakura vhangeri kuriendesa kunyika . Mukushandisa matarenta

atakapihwa tinofanira kuparadzira vhangeri sezvatakarairwa naJesu. Sesuwo takaratidzwa rudo rwaJesu, tine mungava kune avo vasingamuzivi kuti tivataurire pamusoro perudo rwaKe. Mwari akatipa chiedza kwete kuti chive chedu chega asi kuti chitekeshere nekune vamwe.

Dai vateveri vese vaKristu vaiita basa ravo, pangadai paine zviuru zvevaparidzi parikungowanikwa paine munhu mumwe chete ari kuparidza vhangeri munyika dzevahedheni nhasi. Uye dai vose avo vasingakwanisi kunoita basa vaitsigira nemari, netsitsi uye neminamoto yavo kungadai kuine basa ririkuitwa chaizvo nemazvo zvichisvika pakuponeswa kwemweya.

**(10) Tinofanira kuenda kunyika iri kure here kuti tigoverane nevamwe nezvaJesu?**

*1 VaKorinte 7:24*

Hazvitsvaki kuenda kunyika dzevahedheni, kana kubva pavazikanwi vemumusha, kana pariipo patinofanira kushandira Kristu. Tinogona kumushandira mumisha yedu, musangano, neavo vakatitenderedza nevatinoshandana navo kana vatinotengeserana navo.

Nguva huru yeupenyu hwaJesu munerino pasi yaiva yekushanda zvinekutiwira muimba yekuveza ari paNazareta . Ngirozi dzekubatsira dzaiva naIshe weupenyu apo aifamba mbidzana nevanhuwo zvavo uye nevashandi. Hapana aimboziva kuti aiva ani kana akambomupa ruremekedzo. Zvisinei kuti aive pabasa ringatarisirwe pasi, kurapa varwere, kana kufamba pagungwa reGarirea rakazara nedutu remhepo, Jesu akaita basa raKe raakanga atumwa nedenga nguva dzose nekutendeka. Tinogona kuteedzera muenzaniso waKe uye mumabasa epasi pasi uye muzvinzvimbo zvinotarisirwa pasi muupenyu, tinogona kufamba nekushanda naJesu.

Mupositori Pauro anoti, “munhu wese, maakadaidzwa, ngaagaremo naMwari.” Kana tiri vemabhizimisi tinogona kuita basa redu munzira inorumbidza Ishe wedu nekutendeka. Kana tiri vateveri vechokwadi vaJesu tichatakura kutenda kwedu muzvinhu zvose zvatinaita uye toratidza vamwe kuti Jesu akaita sei. Makanika anogona kuve munhu anoshanda nesimba nekutendeka akava muenzaniso waJesu uYo akashanda paupenyu hwake muzvikomo zveGarirea. Munhu wese anozvidaidza kuti muKristu anofanira kushanda zvakadaro zvekuti vanoona basa rake rakanaka vanotungamirwa mukupa mbiri kuMusiki neMudzikinuri wavo.

**(11) Chii chinoitika kumatarenta atakapihwa asi tisingaashandisi?**

*Mateo 25:28, 29*

Vanhu vazhinji vanopa zvikonzero zvekusashandisa zvipo zvavo mubasa raJesu nekuti kune vamwe vanokwanisa kuvadarika ivo, uye vamwe ava vane zvimwe zvavainazvo ivo zvavasina. Vazhinji vanofunga kuti avo chete vane matarenta makuru ndivo vanofanira kuashandisa mubasa raMwari. Vamwewo ndivo vane kunzwisisa kwekuti matarenta anongopihwa kune kaboka kakasarudzwa uye kuti vamwe vose havatarisirwi kuvavo nechekuita mubasa uye mibairo yacho. Asi izvi hazvisiri izvo munyaya yakataurwa naJesu. Apo Ishe weimba akadaidza varanda vake, akapa mumwe nemumwe basa rake rekuita.

**(12) Rudo rwedu kuna Kristu rungava chikomborero sei kune vamwe?**

*VaEfeso 6:6, 7*

Tiine mweya une rudo tinogona kuita basa rinotarisirwa pasi tichiitira Mwari. Kana rudo rwaMwari ruri mumwoyo rucharatidzwa muhupenyu. Kuvapo kunofadza kwaJesu kuchatenderedza tose uye simba rezvatiri richasimudzira nekukomborera vatinenge tinavo.

**(13) Kana ukama hwedu hwakanaka naMwari, chidiso chedu chichava chei?**

*VaKorose 3:23*

Hatifaniri kumirira zviitiko zvikuru kana kugona kukuru tisati taenda kunoshandira Mwari. Hazvidi kuti tinetseke kuti nyika ichafungei. Kana upenyu hwedu hwemazuva ese huchiratidza kuchena (kuperera) uye kurevesa kwekutenda kwedu, vanhu vachagutsikana kuti chidiso chedu ndechekuvabatsira uye kushingaira kwedu hakungavi pasina.

**(14) Chii chinoitika kumunhu aneupenyu hwekutenda nekugoverana nevamwe shoko raMwari?**

*2 Vakorinte 9:6*

Muteveri waJesu, murombo wokupedzisira anekuzvininipisa, anogona kuva chikomborero kune vamwe vanhu kunyange iye asingazivi kuti ane zvakanaka zvaari kuita. Vanogona kusaziva kuti kuburikidza nemaitiro avo vanogona kutanga masaisai (mafungu) ezvikomborero anokura kupararira uye nekudzika zvikuru. Havangazivi zvikomborero zvakavamirira kusvikira musi wekupedzisira pachazopihwa mibairo. Havambozvinzwi kana kuziva kuti vane zvinhu zvikuru zvavari kuita. Havamboswerozvinetesa nekufunganya kana kushingaira kwavo kuchizobudirira. Vanongoenderera mberi chinyararire, vachiita nekutendeka basa rakaiswa pamberi pavo muzano raMwari. Vakaita izvi hupenyu hwavo haungavi pasina. Mweya yavo inenge ichikura nekukura mukufanana naKristu. Vashandi pamwechete naMwari muupenyu huno, uye mukuita izvi varikugadzirirwa kuita basa repamusoro uye rufaro rusina kudzikatirwa muhupenyu hunouya.

*Ndinotenda Jesu mukusiya mbiri yedenga achiuya kuzoshandira zvidiso zverudzi rwemunhu.*

<b>Tenderedza:</b>	<b>Hongu</b>	<b>Kwete</b>	<b>Handisati ndasarudza</b>
--------------------	--------------	--------------	-----------------------------

*Ndavakuona kuti zvikomborero zvikuru zvemweya uye kukura zvinouya kune avo vanoshandira vamwe.*

<b>Tenderedza:</b>	<b>Hongu</b>	<b>Kwete</b>	<b>Handisati ndasarudza</b>
--------------------	--------------	--------------	-----------------------------

*Ndinonamatira kuti Mweya Mutsvene Anditungamire kuteedza muenzaniso waKristu wekufambisa evhangeri: chekutanga, kugona kusangana nevanhu nekuva shamwari; chechipiri, kuva nehanya nezvidiso zvavo panyama uye kuwana kuvimba kwavo mandiri; uye kuvataurira shoko rakanaka re evhangeri.*

<b>Tenderedza:</b>	<b>Hongu</b>	<b>Kwete</b>	<b>Handisati ndasarudza</b>
--------------------	--------------	--------------	-----------------------------

*Ndinopira upenyu hwangu kubasa raMwari uye ndinonamata kuti anditungamire mukushandira vamwe.*

<b>Tenderedza:</b>	<b>Hongu</b>	<b>Kwete</b>	<b>Handisati ndasarudza</b>
--------------------	--------------	--------------	-----------------------------

(C) Merlin Beerman - [www.revelationpublications.com](http://www.revelationpublications.com)  
Illustrations (C) Goodsalt - [www.goodsalt.com](http://www.goodsalt.com)  
These materials may be photocopied and shared but not altered or sold.

Printed in USA by Light Bearer’s Ministry - [www.lbm.org](http://www.lbm.org)

# Matsiko Kuna Kristu



## Kugoverana Nevamwe Zvatinotenda